

1 Tesaronia

Vu'a Anejijihina

1 ¹Nú Poru ho Sivenasi ho Timoti ho ijano sosia ka'ene Tesaronia Godi Amoho 'ee Natohwa Jesu Keriso puni vaji hiju jihipuna'e pasikaho veju. 'Ene maiji vwhianiujine 'ee matauv'iinijaho jona.

Tesaronia Puni Nimairoa 'Ee Ichá'ina Hijuji Teimani 'Wavajina

²Nú jonijihuna'e Godi teimani 'wavura. 'Ene nú na'ia mapoka siporua 'ojuri veijaho nú joni iha 'urihi'l 'ojura. ³Na'ia mapoka'e jara nimaa rohuni kaukara ijí vene 'ee ea oja mihe 'ee nimairoa ka'ene núní Natohwa Jesu Keriso oni vaja 'ee núní Godi 'ee Omijihuni una'i ija kisina 'unama hijuji vwhianiura. ⁴Vwehu nûne Godi ja oja mihe 'ee Hura ja iji pijihajaho hena ka'vara. ⁵'Enajihuna'e vu'a maa maiu'ina ka'ene nú apena roajaho iraru pa'waravara kaivo harura 'ee Godoni 'Avena vaji roe raka ka'ene nûra 'waravajaho nimaa hene ja nimaa rojara. 'Ene nú jonijihuna'e ichá'ina ka'ene hijajaho ja nikúvara. ⁶Ja 'u'o nûra vejuja'ina'e vene 'ee Natohwijara venaja'ina'e vejara. Uneunecha sisea ani ani rejara vo ja Godi oni 'Avena vajijino teamana'eme ira ikaho apejara. ⁷'Enajihuna'e ja 'unama maa ka'ene veju kaji Masatonia 'ee Akaia ora ka'ene nimaa roji'inaka hijuihija 'unama kaji najahara. ⁸'Ena'omo iviamaa Natohwi jihuni vu'ijaho joni rene rausahe va'e Masatonia 'ee Akaiaru pava'ara vo kwaaka mapokaki va'ana. Jara Godi nimaa nimaa rojujaho pu nihe parajara. Ijihunihahi nú pu areri unenu 'aho'a pa'warahuna. ⁹Pu opuipo nûra ja ki'i roume jara 'unama ichá'ina ka'ene 'ekuajaho 'waruvvara. 'Enareja jara godia ira'ata ka'ene iji vejuji nimaa rojujaho are'i kaivo ta'arohe Godi nimaa ka'ene majama hiji'iniji oja mahujaho 'waruvvara. ¹⁰'Enajihuna'e ja iviamaa Huni harihijara kú'o akúpa 'ahi rena rohuniji 'ajaha hiju. Jesu ka'ene Hura vejume kú'o 'urinajara sena ka'ene roajaho vahanumana.

Porura Kaukara Ka'ene Tesaronia Venajina

2 ¹Vwehu nûne ja ojono nihena kavu. Nú joni vu'ajaho nú núní vea panisame vu'ara. ²Ja niheja ja'ina'e nú nimirako Piripai

sise'i 'ahúume haha hianumana kaivo nú núni Godijihuni vaji harura ape'ika'i ja Godoni vu'a maiu'ina ijí ninakaraa renana vajijaho 'waravara. ³Núra ja 'waravajaho puruvare'e 'warahuna pana 'ee 'unama siseijino 'warahuna pana 'ee pisivisame 'warahuna pana. ⁴'Enakaivo Godira nú nimaa vetúarena Huni vu'a maa maiu'inakaho múhana'omo nú emaa teamanahuna'e vehuna pana kaivo Godira núni ojijaho nivena kúmana. ⁵Ja niheju ja'ina'e nú ira toa vene 'warahuna pana 'ee joni uneunecha 'eka'irono pisivihuna pana. Ijihuni majaho Godiho núni vu'a nimaa vetúu. ⁶'Ene emaa 'ee jaa 'ee ea 'aho pu'úmo nú ta'aroru'avarono avahuna pana. Nú Keriso oni apasorua'omo nú núni harurijino vehune sa'ina ⁷kaivo nú masuani ajuarasahe joni vaji hijara areri oahi huni sesamaa'e 'ajohau ja'ina'e vejara. ⁸Nú ja niho'o oja miha paraja jihuna'e nú Godoni vu'a maiu'inijiru pamihara kaivo nú niho'o ura renuva para'eme núni hia 'u'o ja vajihara. ⁹Vwehu núne ja mavwiha. Nú joni vaji hijari vejaho nú ja ahija mihuna senuvume nú onúno harura vene na'ia veiri'a kaukara veji'i Godoni vu'a maa maiu'ina ja 'waravara. ¹⁰Godiho nú nihena kúme nimaa veju'e ja 'u'o nimaa veju. Núra ichá'ina'e ja pu'úmo akume 'ee arimaa'e hine 'ee unenu 'aho'a ea 'aho'a panamuhe 'waru'eme nú nimaa roji'ina pu'úmo hamí hijura. ¹¹Ja niheju núra ichá'ina ka'ene ni'ajihé 'ee ta'arorahé 'ee hine hamí nirisame ea kwínu kwíno areri omahi sesahwaha'e 'waramu ja'ina'e nú hine ja 'waravara. ¹²Ijihuna'e Godi ka'ene ja 'umenau'e Huni ara 'ee hanaji'inijino vahuna 'iamajihuni 'unama ka'ene Hura kive areri rehunjino o'avara. ¹³Ikehuni hahi nú 'u'o na'ia mapoka'e Godi teimani 'wavura. Ja vea ka'ene Godoni ira ike núnuna'i apejari vejaho ja emaadapuni ira puna'a paapejara kaivo ja Godoni ira nimaa'e apeju ja'ina'e apejara. Ijihuna'e ja ea irara ijí ira kaji nimaa ronujaho joni vaja 'u'o kaukara venu. ¹⁴'Enajihuna'e vwehu núne Godoni sosia ka'ene Jesu Keriso oni vaji Jutia namijujipo vejaja'ina'e ja vejara. Ja ehu jopuna'i sisea ichá'ina ka'ene piuniva ja'ina'e pu 'u'o Jua puna'i sisea ija'ina'e piunivaro kirahara. ¹⁵Pu Natohwa Jesu 'anae 'ee poropetia 'ania ja'ina'e nú 'u'o 'ararihúume usevara. 'Enajihuna'e pu Godira ura renuja'ina pavene 'ee emaadapuni nana'eji'ina'e rejara. ¹⁶Jenitarupo Godi nimaa rohuni jihuna'e pu tanu'uruhi'e nú vu'a pa'waravura. Ijihuni hahi pu puni siseijaho veju'e tiresa hina apena ajimu. 'Enakaivo puni eha siseijaho niroe areri rena parana namu.

Porura Tesaronia Kú'o 'Unama Va'e Ki'iro Vwihanajina

¹⁷'Enakaivo vwehu núne nú ja hahijino ma'uako irechamie va'ala kaivo núni ojijaho ijí ja pu'úmo navu. 'Ene núni ura ijaho roe joni urania kihuna'e ura renuva paranúu. ¹⁸Ijihuni majaho nú roe ja kihuna'e ura renu 'ee na Poru na'ia mapoka'e roe ja kihuna'e ura reniu kaivo Setanira

hine roturúhu. ¹⁹Núni nimaaroi jaho irahije 'ee núní eha maa ka'ene núa'e ta'aroruhe vajúhunijaho irahije? Núni Natohwa Jesura ro'amani veijino jara Huni una'i namihunijina. ²⁰Ijihuni maijaho ja núní pinana mamaijina 'ee temarijina.

3 ¹Ijihuni hahi vea ka'ene nút areri pakirasahuna'e henareja nút vvhajajaho maijaho areme iki Atenisi hi'pisana ronare'e hiju. ²'Ene hu Timoti núní vwea ka'ene nút pu'úmo Godoni kaukara veji'ina ka'ene Keriso oni vu'a maa maiu'ina 'waravi'ina ranavu'e ja ni'ajihe joni nimairoa kisina'e re'amarono vu'u. ³'Ejakame jara siseisei hijujara ja patanu'urihuna. Ijihuni maijaho ja niheju nút nika'ina hihuna'e iji pijúhana. ⁴Núra ja pu'úmo hijajino nút ja pu'úmo sise'i 'ahúhunaka 'waravajaho ja nihejara'omo iviamaa ijá'ina renu. ⁵Ijihunihahi na areri pakairahuna'e henarejo joni nimaaroi jihije 'ahiu'e ranavu'e vu'u. Ijihuni maijaho na oja hianimujaho vejuro'i pisivisavi'inijara pisimiakame núra kaukara ka'ene vejajaho maa pa'ana'e rena ve'amarono ranavu'e vu'u. ⁶Iviamai Timotihu ijí joni rene joni pinana maa apene 'unama núní roana. 'Ene jara Godi nimaaroi oja mahe ija kisi apene joni una'i saname vejujaho ro 'warumana. Jara na'ia mapoka nút vvhianúe nút ura ja ki'i 'ahúu ja'ina'e areri ja 'u'o ura nút kú'i 'ahiu. ⁷Vwehu núné nút ijihuni hahi iki hijujaho sisea piuname ahisina apeji'i hijura kaivo jara nihoo'nimaaroi rojujhuna'e nút oja sonahúu. ⁸Jara Natohwi jihuni vaji kirasahe namijujara rejule nút hamí hiju. ⁹Nú ichá'ina'e jonijjhuna'e Godi teimani 'wa'eja? Ijihuni maijaho núra temara ka'ene jonuna'i 'ekajihuni hahi nút Godoni una'i jonijjhuna'e temarasahura. ¹⁰'Ene nút na'ia 'ee veiri'a majaa hine joni niura kihuna'e siporua 'ojura'omo roe kime raka ka'ene joni nimairoa vaji panavujaho ni'ajihe areri rehuna. ¹¹Godi ka'ene núní Omijara Huhusune 'ee Jesu ka'ene núní Natohwiji'o núní 'unama venuhakame nút vu'e ja kihuna. ¹²Natohwijara venae jara ea kwinu kwino oja 'ekaravura 'ee emaa mahoo'o oja 'ekaujaho emarene 'ee ameurahe arihamo areri núra jonuna'i vejuja'ina'e renama. ¹³'Ene Hu ja vena'e joni oja Godi ka'ene núní Omijjhuni una'i ariramaa rene panama'eje núní Natohwa Jesuho 'ee Huni ea ariramaijipo Hu hu'úmo roavari veijaho matauma namihuna.

Kara Ka'ene Godi Teamahunijina

4 ¹Vwehu núné Vu'a túchamaa pina ikena. Nú Natohwa Jesuni vaji ja jarirame 'waravu núra vu'a ka'ene 'waravume ja hene oju kaja'ina'e nija'ina oje Godiho teama'amana. 'Eje ja maranie ajime va'amana. ²'Ejume nút Natohwa Jesuni harura vaji varapa raka ka'ene vajihajaho ja nihena kivu. ³Ijihunihahi ikaho Godoni uraijina ja nihoo'e ea ariramaa rehuna'e ura renukúne 'uasa pave'avara. ⁴'Ene ja ea kwinu kwino joni hahi jihipuni hora vene hamí 'ajo'eje arira'e nava. ⁵'Enakúne ja Jenitaru

ka'ene Godi pahene pakavujipo puni hahapo napara itunama parajukame 'unama ka'ene vejuja'ina paveha. ⁶'Ejume ja 'unama ikehunakino sisea vene vweuna panama'amana. Ijihuni maijaho Natohwijara ike uneunecha ikihipuni eha ijaho venuna. 'Ene nū nimirako 'waravaji kú'o nahama 'waravu. ⁷Ijihuni maijaho Godira nū 'umenuajaho nū 'unama sisea ka'ene 'uasa ve'avarono ija pijúhuna pana kaivo nū ariramaa rehuni jihuna'e iji pijúhana. ⁸'Enajihuna'e ea irara ike hene pataarohujaho hu emaa papataarohu kaivo Godi ka'ene Huni 'Avena mahaji pataaroha avanu. ⁹Jara vwehu jona ichá'ina'e oja mihunijaho ea pina mai'o pavene 'warahuna. Ijihuni maijaho 'unama ka'ene vwehu jona'e ichá'ina oja 'ekarahunijaho Godira ja najahana. ¹⁰Nú niheju. Ja 'unama kajaho vwehu jona ka'ene Masatonia hijujihi pu'úmo vejura kaivo vwehu nūne nū ja jarirame 'waravujaho ja maji vene ihajinanama apene vaha. ¹¹Nú ja ni'waravu ja'ina'e masuani hine jomaaru vene 'ee joni iji kaukara veji'i hihunijaho joni ura nimaanrena'ama. ¹²'Ejakame ja ea ka'ene samaa hiju jihipuni una'a hami hine 'ee uneunecha 'aho'a papivusahuna.

Keriso Oni Vaji Kwamasahajih Aherama Rohunijina

¹³'Enakaivo vwehu nūne jara ea ka'ene kwamasahu jihipuni vu'ijí pa'warave he'ava jihuna'e hine ea ka'ene panimaa rojujipo vejuja'ina temuka apehuna nū ura parenu. ¹⁴Nú Jesura kwame kú'o 'urinaji nimaan ro'avajaho Godira ija'ina'e ea ka'ene Jesuni vaji kwamasahajija Hu hu'úmo aherame rohuna. ¹⁵Na ikaho Natohwi jihuni iri vaji rena roaji ja 'waravu. Nú ea ka'ene mai'o hijukija Natohwijara ro'amajaho nū urasahe pavahuna kaivo nū mahi'eje ea ka'ene kwamasahajipo 'urihuna. ¹⁶Ijihuni maijaho Natohwijara Huhusu 'ona oji'ina puni natohwiji'i mwasirivi'i ariha Godoni viti'iniji'i ro'eje ea ka'ene Keriso oni vaji kwamasahajipo urasahe 'urihuna. ¹⁷'Ejakame nū ea ka'ene mai'o hi'avajija 'urina va'e kahi 'imitia vaji pu piunime ahuma ajima va'e ichutoi Natohwijaho piunahuna 'ee nū Natohwijihi pu'úmo majama hihuna. ¹⁸'Enakúne ike vu'a ikino ea kwinu kwino 'wame ni'ajarave oja sonahi'eje hiha.

Natohwijara Rohuni Veiji Amairiara Hunijina

5 ¹'Enakaivo vwehu nūne iviamakino ichá'ina ho vea irakijino ikara rehunijaho na jona pavene 'warahuna. ²Ja ijaho ni maho'o hejume pa'arena ja'ina'e Natohwi jihuni vejara ro'amajaho areri nesa apeji'inijara na'i rouja'ina'e rohuna. ³'Ene pu vea ka'ene unekajaho pare'ena 'wavi'i matauma hi'avajino ni'aha kwino sisea puni haha 'ahi rehuna. Areri napari hariha nahe'i 'ahau'e vejili haha ka'ene henuja'ina'e hehuna kaivo pu juhaha usehunijaho areri parehuna. ⁴'Enakaivo vwehu nūne ja nututa pahiju jihuna'e iji vea kajaho ja nesa apeji'ina punali paroe asitahuna. ⁵Ijihuni maijaho ja hanaji'ini jihuni harihija 'ee ve'iri'ijihuni harihija.

Nú na'iaho nututi jihuni harihija pana. ⁶'Enakúne roe ja pu'úmo ea 'ahopo vejuja'ina'e panotui kaivo 'urine nia nirie 'aiha veji'i hija. ⁷Ijihuni maijaho ea ka'ene notujaho pu puni nia na'i notuura 'ee ea ka'ene toa sisea ine nanamiujaho pu na'i toa sisea ine nanamiura. ⁸'Enakaivo nú ea ka'ene veirihuni jihuna'e roe masuani núni túratakaho nimairoa 'ee oja 'ekaravujino same 'ee isúa nimairoa ka'ene ni'ajúhajino sava. ⁹Ijihuni maijaho Godiho nú Huni sena vaji aruhuna iji pijúhuna pana kaivo ni'ajúhajaho núni Natohwa Jesu Keriso oni vaji apehuna'e ija pijúhana. ¹⁰Hu núnijihuna'e kwama jihuna'e nú mai'o hi'eja ho kwamasahuna kaivo nú pu pu'úmo ahuma majama hihuna. ¹¹Ijihuni hahi ojono 'wame ni'ajarame 'ee ojono nasarame 'urine emare'avara. 'Ene ja niveju kaja'ina'e ve'avara.

Túchamahuni Kara Ichá'iniji Ohunijine 'Ee 'Ajomajina

¹²'Enakaivo vwehu núne nú ja jarirame 'waravujaho ea ka'ene joni vaja kajino kaukara kikisina'e vene 'ee Natohwi jihuni vaji ja 'ajoha'e 'ee vu'a ka'ene pu 'waravujaho ta'arora'avara. ¹³'Ene oja 'ekauri vajijino pura kaukara ka'ene vejujihuna'e puni hora vene ira mamaa ijino 'wara'avara. 'Ene ea 'aho pu'úmo matauma hi'avara. ¹⁴'Ene vwehu núne nú ja jarirame 'waravujaho ja ea ka'ene vu'ataa pahejl'inijija 'urara'avara. 'Ene ea ka'ene tea junavi'inijija 'ee ea ajuasina ni'aji'avara. 'Ee ohura paape'avara ka'i ea 'aho pu'úmo masuani hi'avara. ¹⁵Ja pakileje ea 'ahopo ja sise'i 'ahiakame ja eha vene pununa'i sisea ve'ava. 'Enakaivo na'ia mapoka 'unama ka'ene vejakame ea kwinu kwino maranie 'ee ea maho'o 'u'o maranuhunijiru sarame ve'avara. ¹⁶'Ene na'ia mapoka'e temarasa'avara. ¹⁷'Ene na'ia mapoka'e siporua maijí 'ojil'i na'avara. ¹⁸Uneunecha mapoka ka'ene rejupija Godi teimani 'wa'avara. Ijihuni maijaho ijaho Godoni ura ka'ene jara Jesu Keriso oni vaji vehuna'e ura renujina. ¹⁹Ja Godoni 'Aveni jihuni vena paveje uta'amana. ²⁰Vu'a ka'ene túna'i rehuniji 'warave he'avajaho pasena'avara. ²¹'Enakaivo uneunecha mapokakija 'eke hamí piuhihu va'o mamaijija ija kisina'e 'eke 'uninami'avara. ²²'Unama ka'ene sisea rehuna sa'ina'e ki'avajaho juha'avara. ²³'Ene ivi'a Godia ka'ene matauvii'ini jara mah'o venae arimaa'e rene 'ee joni 'avena 'ee joni oja 'ee joni haha mah'o 'ajohakame vea ka'ene núni Natohwa Jesu Kerisora ro'amajaho niho'o panamu'amana. ²⁴Hu niho'o pauchavi'ini jara a 'umenana'omo Hu aneja venajaho ve parahuna. ²⁵'Ene vwehu núne núni siporua 'onu'avara. ²⁶'Ene vwehu núna 'ajoramé ura mina vena'avara. ²⁷Na Natohwi jihuni ihi 'urahi'i 'waravukúne ike asurakaho tahe vwehu núna mah'o he'avara. ²⁸Núni Natohwa Jesu Keriso oni maiji vwihanúujaho ja pu'úmunu.